

Il funtôr sintatic (clamât ancje "pronon aton subiet pleonastic")

Lis formis finidis dal verp furlan a son scuasit simpri cumbinadis cuntun element aton, che timp indaûr al jere un pronon aton. Cumò, par altri, chel element al à pierdût la funzion pronominâl. La sô funzion chê gnove e je in pratiche chê di judâ a interpretâ la struture sintatiche de frase.

Par chel o propon di clamâ chel element *funtôr sintatic*, ancje se lis gramadiis fintremai cumò lu à clamât *pronon* (aton, subiet, pleonastic).

Chi sot le cjatais une tabele cun dutis lis formis libaris dal funtôr sintatic, ven a stâi chês formis che si lis metin denant dal verp. Lis formis che si tachin daûr dal verp a puedin sei un tic diviersis e a menin dongje fenomens fonosintatics. Par chel lis tratìn lî dai paradigmis verbâi.

Formis libaris							
persone	nominatîf	gjenitîf	datîf	acusatîf	locatîf	istrumentâl	riflessîf
I sing.	o	Ø	mi	mi	Ø	Ø	mi
II sing.	tu	Ø	ti	ti	Ø	Ø	ti
III sing. fem.	e	indi, 'ndi ind, 'nd	i	le	i	parie	si
III sing. masc.	al	int, 'nt	i	lu	i	parie	si
I plur.	o	Ø	nus	nus	Ø	Ø	si
II plur.	o	Ø	us	us	Ø	Ø	si
III plur. fem.	a	indi, 'ndi ind, 'nd	ur	lis	i	parie	si
III plur. masc.	a	int, 'nt	ur	ju	i	parie	si

No + funtôr

La negazion **no** si le met simpri denant dal funtôr:

No lu vûl viodi.

No ju cognòs.

No si capìs.

Se il funtôr al scomence par vocâl **a**, **e**, **o**, la vocâl e cole:

Cun te no feveli!

No son i pacs che o spieti.

Marie no ven.

Atents: no + al = nol

Stiefìn nol ven.

Se il funtôr al scomence par vocâl **i**, **u**, la vocâl inte pronunciazion e passe a semivocâl:

No i plâs. /noj/

No ur conte nuie. /nowr/